



148  
2

74
148
2



鹽法議畧卷二

密縣 王守基 纂

浙江

浙江鹽務行銷浙東浙西江蘇之蘇松常鎮四府太倉  
一直隸州安徽之徽州一府廣德一直隸州江西之廣  
信一府明季僅行引四十四萬四千七百六十九道每  
引載鹽三百斤其場竈坐落之仁和錢塘海甯海鹽石  
門平湖鄞縣慈谿奉化鎮海象山山陰會稽蕭山餘姚  
上虞十六州縣行票十四萬九千五百張每張載鹽一  
百斤

148  
2

國初順治三年巡鹽御史王顯奏各處行鹽皆以二百斤成引兩浙應剖兩引爲三引每引載鹽二百斤共改行正引六十六萬七千一百五十三道零將票兩張折合一引共改行票引七萬四千七百五十道康熙七年楊毓蘭題稱海禁森嚴梟販斂迹松所商人汪嘉正呈請加正引一萬道在崑山常熟太倉行銷商人黃都呈請加正引三千五百道在華亭婁縣青浦嘉定行銷商人程洪呈請加正引一千四百道在嘉定行銷部議覆准松所共加正引一萬四千九百道康熙十七年御史傅廷俊奏凡丁多引少之州縣皆宜酌量加引增課十

八年經巡鹽御史孫必振題定浙江加正引一萬八千六百四十五道零加票引一萬八千九百四十八道又傅廷俊條奏仁和錢塘爲商民輻湊之區應多增引目嗣經巡鹽御史成其範等先後題稱二縣逼近場竈票引常苦壅滯勉諭商人加票引六千道經部駁令加增嗣又加票引一千道二十二年巡鹽御史詹哲題請將諸暨義烏浦江鹽引改歸金華西安常山三縣代銷部議三縣既可代銷他處之引其額引應酌議加增嗣據題定金華西安常山加正引一千道又靖江孤懸江北逼近淮場從無商人領運赴銷祇令完納包課雍正十

鹽法通志卷之二  
一年江蘇議歸淮商運銷經浙撫程元章題稱靖江改食淮鹽則蘇常引地盡爲淮私透越自宜仍銷浙鹽每年加正引三千道總計正引七十萬四千六百九十九道票引十萬六百九十八道此浙江應銷額引八十萬五千三百九十七道之源委也前明本係商人納粟於邊六斗五升中引一道赴場支鹽二百斤無所謂課後每引加餘鹽七十斤征銀八萬二千二百八十二兩二錢六分五釐名爲正餘後又每引帶餘鹽三十斤加征銀一萬四千九百二十七兩六錢四釐名爲加餘又因先行小票准令小販零星酒賣嗣將小票裁革商人代

納票課一萬四千四百五十九兩四錢八分四釐名爲代票靖江一邑向係土商領票赴崇明買鹽運賣包納課銀一百八十二兩四錢三分七釐名爲靖課 國初以正餘加餘代票靖課彙併一款總爲商課征銀十一萬一千八百五十一兩七錢九分前明邊商得引售於內商每引價銀一錢三分二釐名爲引價 國初裁去邊商引從部發將引價歸入商課征銀五萬八千七百九兩八錢八釐江南溧陽一縣向食淮鹽後改食浙鹽征課銀四千兩票引折合正銀征課銀八千三百四十兩四錢三釐順治十三年因兵餉緊急奉部題增浙江

鹽法議畧 卷二  
鹽引十萬道嗣因引鹽壅積題明帶課不行鹽加課銀四萬五千六十七兩四錢九分五釐浙江鹽課合所科則不同康熙元年台所戶口凋殘將額引劃出六千道於嘉所行銷四千道於松所行銷陞課銀九百四十四兩三錢七分九釐七年松所增引徵課銀四千四百九十三兩一錢七分三釐又因紹所大嵩場遷徙界外產鹽不敷劃出額引於杭所行銷二千八百道嘉所行銷八千道松所行銷四千一十六道陞課銀八百六十一兩八錢九分九釐又紹引改歸嘉定縣行銷一千六百九十六道陞課銀三百九兩六錢五分四釐各所徵課

原分上中下三則康熙五年紹所下則商人消乏引課虛懸著令上則商人代銷三千二十四道陞課銀一百六十一兩五錢四分五釐九年台所場地遷徙無場買鹽額引改歸杭所二千六百二十五道陞課銀三百八十六兩二錢三分十年因溫所土瘠民貧銷鹽短絀額引改歸杭所六千道陞課銀一千三百十二兩二錢十五年松所太倉州下則引地改歸常熟中則三千引陞課銀二百九十七兩二錢四分五釐十六年科臣條奏革除割沒名色每引加鹽二十五斤按各則加課三十八年豁免一半加課銀三萬一千三百八十九兩二錢

六分三釐十七年戶部題覆浙江票引課銀一錢三分  
四釐應照溫所科則每引增銀三分增課銀二千二百  
八十四兩二錢七分六釐又計丁加引增課銀一萬一  
千五百四十六兩九錢四分五釐仁錢二縣加票增課  
銀一千四百六十七兩二錢一釐金華等三縣加引增  
課銀三百六十九兩九錢一分一釐三十五年紹所商  
人情願將下則引一萬八千三百七十八道照中則一  
例起科陞課銀一千四百四十一兩三分五釐五十一  
年溫所商人以地近場竈僻處山陬將額引劃出七千  
九百四十八道改歸紹所行銷陞課銀一千一百七十

九兩七錢六分七釐乾隆二年因紹台兩所引鹽旺銷  
奏撥松所一萬引歸紹二千引歸台陞課銀二百十二  
兩五錢一分二釐三十七年因松所額引壅滯奏撥二  
萬引歸紹所入額行銷陞課銀一千七百九十三兩五  
錢四分六釐三十八年因諸暨義烏浦江額引暢銷奏  
請撥台引三千三百八道歸紹所行銷陞課銀四百兩  
五錢四分三釐靖江加引征課銀七百七十八兩八錢  
三分道光二十八年欽差查辦浙江鹽務杭嘉紹三所  
加增鹽斤但征正課不征雜費加課銀二萬一千七百  
八十二兩七錢四分此浙江應征商課三十一萬一千

三百八十二兩六分之源委也浙江產鹽共三十二場其轄於甯紹分司者二十在杭州曰仁和曰許村在紹興曰錢清曰三江曰東江曰曹娥曰金山曰石堰在甯波曰鳴鶴曰清泉曰龍頭曰穿長曰大嵩曰玉泉在台州曰長亭曰黃巖曰杜瀆在温州曰長林曰雙穗曰永嘉其轄於嘉松分司者十二在杭州曰西路曰黃灣在嘉興曰鮑郎曰海沙曰蘆瀝在松江曰橫浦曰浦東曰袁浦曰青村曰下砂曰下砂二三場在太倉曰崇明此外尚有溫郡南監一場乾隆二十八年復設產鹽無多不立場員令蒲門巡檢兼管各場之鹽皆出於煎故統

謂之末鹽煎鹽之法先於傍海近潮之處開闢坦地削去草根光平如鏡名曰攤場又謂之灰場分上中下三節近海爲下場以潮水時浸不易乘日曬也其中爲中場以潮至卽退恆受日易曬土也遠於海爲上場以潮小不至必擔水灌洒方可開曬也凡潮汛上半月以十三日爲起水至十八日止下半月以二十七日爲起水至初三日止潮各以此六日大滿故當潮大之時三場皆沒自初三十八以後潮勢日減先曬上場次曬中場最後曬下場故上中每月得曬兩次下場或僅得其一也灰場者言其土細如灰也盛夏二日或三日秋冬四

日曬力方足嚴冬則西北風尤勝日曬也俟地起白霜用鐵鏟收起名爲刮土所刮之土三月謂桃花土六月謂伏土九月謂菊土伏土最鹹桃土菊土次之傍築小槽廣四尺長八尺封塗於底覆以刮竹鋪以淨茅下承以池實土二十四擔於槽沃灌清水滲及週時泥融水溢流入池中卽成鹽滷試滷之法採廣東石蓮用兩竹管約長六七寸並縛於細竹竿頭分置十蓮於管內管口用竹絲隔定探入滷井滷沃蓮浮浮三四蓮味重五蓮俱浮尤重浮取其直若橫直相半則味薄蓮沈於底則滷不能入煎矣煎鹽用盤盤以鐵版湊合底平如盂

四周高一二尺其合縫處以滷和灰嵌之一經塞結永無罅漏嘉慶四年詳定設立官廠領鐵開鑪不許私鑄煎滷於盤末卽凝結將阜角末和米糠攪沸滷中頃刻結成蓋阜角結鹽猶石膏之結腐耳其鹽色白但味稍淡不如淮鹽之爲勝也前代竈課本係按丁征鹽以供商支明季改征銀兩邊商中引一道由庫償給銀二錢一分八釐令其買鹽是爲庫償商以外餘銀充餉是爲餘糧惟浙江沿海之區竈地最廣不盡出蕩供煎兼可以種花豆木棉竈民交產往往混入民田故其名目不一有離海較遠竈戶不諳煎鹽應納鹽斤俱准折銀



鹽法議畧 卷二  
解司名曰折價有竈丁不諳煎鹽發縣與民一體當差  
應納之銀均派於秋糧餘米內征收名曰水鄉有名下  
得分蕩地召人佃種追價名曰白塗此外並有迷失竈  
地課銀無征皆於民戶秋糧餘米內撥補完名曰包補  
統謂之庫價餘糧 國初按額征庫價銀六萬三千四  
十二兩四錢六分七釐征餘糧銀二萬五千三百三十  
三兩三錢一分順治十四年杭州紹興松江等府丈出  
新漲蕩地及墾成熟地陞課銀一千三百五十二兩一  
錢五分六釐温台各場先因遷徙場不產鹽商人自杭  
運鹽民食維艱康熙五年於温之永嘉瑞安台之臨海

黃巖界內攤沙起竈開煎陞課銀三百兩一錢一分又  
丈出餘姚縣新漲沙蕩陞課銀五百九十五兩三分自  
康熙十六年起至六十一年止各縣場丈出新漲沙蕩  
歷年陞課銀二千七百四十九兩二錢三分五釐又温  
台甯各場遷徙之後續經展復陞課銀四千三百二十  
一兩八錢二分六釐定海縣展復陞課銀八百三十七  
兩六錢九分一釐又自雍正元年起至嘉慶四年止各  
縣場展復新漲陞課一萬五千八百四兩四錢七分一  
釐當初鹽差出京隨帶京書應支經費係竈戶完納嗣  
將京書裁革經費充公征銀一百二十九兩四錢此浙

鹽法書卷之二  
江應征竈課十一萬四千五百四兩六錢九釐之源委也。正課以外尚有入正雜款各州縣設有巡捕弓兵給與工食賞項限獲私鹽變價充餉歲有定額名爲功績嗣據總督李衛以按額責之弓兵難免誤陷平民題明私鹽不敷於餘引租價項下撥補解功績銀六千九百一兩五錢七分五釐各縣場額設秤手係商人保舉每名納稅銀五錢請給牙帖方准充當征牙稅銀八百七十五兩崇明一縣孤懸海外且有鹽場難銷商鹽按十三丁派一引共引二千八百五十六道照溫所科則納包課銀七百四十一兩四錢一分八釐又崇明之半洋

等沙田劃隸海門廳管轄由海門地丁項下編征崇明包課銀六十三兩九錢定海一縣亦係按丁派引納包課銀四十二兩一錢四分六釐各沙蕩田地有應征備荒銀兩原係以備歲歉養竈嗣經籌款積穀卽將此款作爲差承齋奏起解錢糧等項銀兩康熙八年裁去冗費節省備荒銀一千四百六十六兩八分五釐又節省各役工食銀三百九十四兩四錢前代相沿鹽課錢糧每兩多征銀一分名爲滴珠解部充餉共征滴珠銀四千一百四十五兩二錢四分八釐以上合諸商課竈課此浙鹽每年入正奏銷銀四十四萬三百七十二兩二

錢六分一釐之源委也其不入奏銷雜款則有歲征公費銀十七萬七千一百三十一兩五錢浙江正引每引應輸鹽政分規銀一錢八分筆帖式分規銀七分共銀二錢五分雍正二年鹽政噶爾泰奏明歸公爲各官養廉及解京各衙門飯銀前鋒護軍統領養廉等項之用餘銀充餉征河餉銀一萬二千兩原係鹽政運使捐輸康熙三十八年奏明於引課場課內每兩加平三分隨正輸納征車腳銀二千八百四十七兩三錢三分八釐鹽課每兩征滴珠一分之外又征銀七釐以給解餉路費征紙硃銀二千四百十六兩一錢八分八釐按每引

三釐解部爲刷辦鹽引紙張工食之需征引費銀八萬五千三百九十一兩五錢一分八釐原係甲商經收爲一切辦公應酬之需後經總督李衛以商人自收自用所費不貲奏明裁去浮濫歸庫征收征充公禮費銀二萬六千兩雍正五年李衛奏明商人情願捐輸移解藩司充地方公用征減存程費銀一萬五千兩乾隆九年巡撫常安咨明抵解運司應捐銅斤水腳票商輸銀九百五十兩引商輸銀一萬四千五十兩征引目腳價銀五千六百兩鹽政將引目領出各商公繳腳價原係鹽政應得之項嗣經噶爾泰奏明歸公征鹽規銀六千三

百八十兩雍正四年李衛奏明酌與將軍織造等官鹽規銀五千七百六十兩餘銀六百二十兩爲將軍屬下進京路費之用征貼解銀三萬兩京協各項例有加平餘平飯食等款統歸貼解征收征引規銀七千五百五十兩四錢八分原係場官私征陋規乾隆十年歸公由場征解嗣於五十九年改歸商輸正引征銀一分票引征銀五釐征竈課耗羨銀一千七百六十三兩五錢乾隆十年定案浙省每兩二分江省每兩三分隨正征解各場征稅契銀歲無定額惟此款於次年報部有無完欠分別場員功過其餘均不入奏考核統謂之雜征焉

至於帑息則海塘歲修帑本一百萬兩各屬塘工歲修帑本三十四萬八千四百兩緝匪帑本四十萬兩同安船帑本十萬兩旗營馬價帑本二萬數文書院帑本一萬八百兩育嬰堂一千七百兩旗營紅白賞帑本制錢二萬千歲輸息銀二十二萬七千二百兩息錢二千串此浙鹽雜款帑息之源委也其行鹽則向分六所一曰杭州所在府治東北艮山門內凡仁和許村二場引鹽於此過掣派行正引十一萬八千六百十二道一曰紹興所在府西北六十里山陰縣白鷺塘地方凡錢青三江東江曹娥金山石堰鳴鶴清泉龍頭穿長大嵩玉泉

鹽法義舉卷二  
十二場引鹽於此過掣派行正引二十三萬九千五百六十八道一日嘉興所在府治南春波門外五里卽宋玉霄萬壽宮遺址凡西路黃灣鮑郎海沙蘆瀝五場引鹽於此過掣派行正引二十六萬四千四百十五道一日松江所在府治西南二里婁縣地方凡橫浦浦東袁浦青村下砂五場引鹽於此過掣派行正引五萬九千六百三十三道以上四所設有批驗大使每年以夏冬二季掣鹽孟月報掣季月掣畢鹽政皆親臨之一日台州所專掣長亭黃巖杜瀆三場引鹽派行正引一萬一千五百十九道一日温州所專掣長林雙穗永嘉三場

引鹽派行正引七千九百五十一道此二所不設批驗大使且海運風濤多阻不按季分隨運隨掣由該府主之温台二所之引祇行銷本府及附近該府數縣松所之引祇行銷本府太倉州及蘇屬之崑山新陽常熟昭文四縣其餘各府州縣則地偏浙東者分銷杭所紹所之引地偏浙西者分銷杭所嘉所之引而十六州縣票引不與焉商鹽過掣開運經過關津例須盤驗除杭所運往臨安等縣引鹽由杭關稽查外杭紹二所運往浙東之鹽則過富陽桐廬嚴州三關杭嘉二所運往浙西之鹽則過蘇州湖州兩關其餘若諸暨爲紹所運銷諸

暨三縣之要隘青田爲溫所運銷處屬各縣之要隘仙居爲台所運銷永康等縣之要隘皆設有營弁縣捕專司盤驗以防漏私各所科則原皆輕重不等嗣經李衛整頓一律暢銷將杭嘉紹三所定爲每引課銀三錢九分七釐零溫所每引課銀一錢九分零台所每引課銀二錢七分零惟松所尙分三等中則每引課銀四錢二釐零下則二錢八分六釐零下下則二錢五分一釐零各縣肩票引則以八百斤成引征課銀一錢九分零至正引斤重原定每引二百斤外加耗滷二十五斤嗣因除去割沒加鹽二十五斤鹽政先收陋規二錢五分暗

予加鹽三十五斤後將此款歸公鹽亦照舊加運乾隆元年特奉 恩旨杭嘉紹三所加鹽五十斤松台溫三所予以四百斤成引並不加課道光二十八年查辦鹽務杭嘉二所又加鹽四十斤紹所加鹽二十斤故溫台松三所每引行鹽四百斤杭嘉二所每引行鹽三百七十五斤紹所每引行鹽三百五十五斤此又浙鹽科則不同斤重各異之源委也浙江引鹽之外兼辦帑鹽始於雍正六年總督李衛以松台溫三府場鹽旺產配引之外常有餘鹽以致竈戶漏私礙引奏明發帑銀八萬兩交各場員儘數收買嗣因玉環舟山岱山舩艚等處

私鹽刮煎日盛梟販四外充斥先行奏明一律辦理玉環在太平樂清兩縣交界周圍七百餘里有洋塘後垵鹽盤三處潮水浸灌可以煎鹽奏設玉環同知交帑銀二千兩使經理收鹽事宜舟山在定海界內孤懸海外曠衍五百餘里共三十七澳皆可刮淋煎滷奏發帑銀四萬兩分交營縣各庫將內港十五澳責成定海縣知縣內洋二十二澳責成定標中營游擊設倉收買岱山亦在定海界內附近有秀山長塗二澳淋煎最旺收鹽事務選委提標中營守備齎持帑銀會同定海縣丞辦理舩艚在溫郡平陽縣界卽所謂南監場也先因地坍

人棄嗣後沙塗遠漲三十餘里民多私煎奏仍設竈招丁發帑銀四千兩交溫州府庫委蒲門巡檢管理收發崇明場鹽除本地民食外但配靖引亦係發帑收買崇明縣主之所收帑鹽儘銷本處魚戶蜚戶漁鹽亦准引商帑商運往旁處銷售各照科則納課外輸經費銀一二三錢不等除歸帑本經費餘銀作爲盈餘舟山收鹽較多每年提撥四千三百引發交松江提標五營在松郡城內四門外開設五店銷賣謂之營鹽所獲利息每引支給弁兵薪水銀六錢七分餘銀統歸帑鹽盈餘自辦帑鹽以後私淨官暢每年額引不敷商運加領餘引

十五萬道凡商運餘引每引輸租價銀四分卽前所謂抵撥功績者也所完課銀與帑鹽盈餘彙併一案另冊題報每年約銀十萬餘兩浙江佐雜養廉卽由此款項下添給嗣後日漸廢弛商亦罷做至咸豐年間所報不過一萬數千兩焉然正課則年清年款從無蒂欠卽帑息亦多完至咸豐五年不似他處積欠累累是浙鹽維持大局實得力於帑鹽居多也自淮鹽不通浙江又曾創辦餉鹽前江西省多係淮岸惟廣信一府與常山毗連所銷浙鹽卽由常山額引內分銷長江梗阻淮鹽不到西岸經江西撫臣奏借浙鹽三萬引由浙撫招商摺

運赴江西行銷嗣會中堂駐軍江西奏明擴充辦理專委大員在浙省設局督理運鹽在江西之樟樹鎮設局督理分銷所收課銀接濟軍餉故名餉鹽惟常山一帶山路崎嶇非騾夫不能轉運脚價頗費且浙課每引三錢九分加以雜款等項亦須一兩六錢兼收淮課二兩六錢成本過重故辦理數年之久僅銷引十萬有零迨咸豐九年浙撫奏請續辦未能舉行而浙省失陷全綱遂皆墮地矣當省城甫經克復不得不試辦抽釐以濟軍餉迨全浙肅清以後理宜漸次規復舊制乃當事者習抽釐之便卽欲以此行諸永久且現辦抽釐亦疏節



闊目並無詳細章程但分嘉湖二府蘇松常鎮四府太倉廣德二直隸州爲浙西分金衢嚴紹甯處温台八府及徽州廣信二府爲浙東各委道府大員浙西於上海設立總局浙東於紹興設立總局督辦票運事宜商販運鹽先赴總局領票以五十引爲一票引之斤重悉照各所舊例按斤抽釐或八文或十文十二文不等先完一半其餘一半俟運鹽到岸銷售得價然後完納各府皆設府局專司核收此項半釐杭州府另設一局但辦杭所運行浙西票鹽至甯波紹興兩屬多係往昔行票引之地課額甚輕温台兩府雖行正引課與票等現在

並在票運但各處設卡見鹽抽釐每斤亦三四文六七文不等蓋往昔票引有肩住之分肩引逼近場竈小販肩挑八百斤爲一引住引稍遠場竈有商運鹽住賣四百斤爲一引其抽釐之多寡想亦因此而分也所收釐錢統歸該府局彙報總計每年釐數約制錢一百餘萬串合銀六十餘萬兩較引商輸納之款尙有六七成然銷鹽實不及額引之一半初辦猶見暢旺繼卽漸行短絀松所短絀尤甚上年又有松所改歸官運之議迄今未見辦有成規重抽釐而疏防私雖百變其法恐終亦無善法矣夫辦鹽必先淨私不獨浙江爲然在浙江尤

爲緊要關鍵非但境內產私之地太多蘇松常鎮與淮揚場竈祇隔一江淮鹽味重價廉最易飛越浸灌向來責成鎮江海防同知與京口副將駐紮江面稽查堵緝尙不能禁故李衛整頓浙江鹽務特兼總督之任節制江南捕盜事務將淮私渡江奏交常鎮道就近專管然後收餘鹽以淨內私減雜課以敵暗私引鹽始行暢銷前後莫能及此其已然之迹今皆可見不此之務而斤斤較量於票運官運之間庸有冀乎說者或曰抽釐之法惟知見鹽抽釐不論官私安問淮浙此說似是實非鹽之爲物日用必需懷挾甚便漁艇來往之港皆可走私三家僻壤之村亦能銷鹽人人而稽之日亦不足矣歷考成法緝私雖嚴而終歸於減價敵私職此故也是所望於任鹺政者平心察之

福建

福建惟汀州一府爲粵鹽口岸其餘皆食閩鹽當初本係商辦僅徵鹽課銀七萬六千九百餘兩至雍正元年經督臣滿保查出鹽官得受陋規銀八萬餘兩歸入正項此正課十五萬九千餘兩之所由始也將鹽官鹽商裁撤各場委官監管按擔抽稅其附近場竈之處每擔抽錢一百五十文按九申易銀一錢六分六釐六毫以

鹽法議畧 卷二  
一錢五分作爲正課以一分六釐六毫作爲錢水遠於  
場竈者抽稅加重更多收錢二三十文或四五十文不  
等名爲長價與錢水皆以供委官人役薪水之用改章  
伊始抽稅尚旺每年除報正課外常盈餘銀十二三萬  
十七八萬不等行之日久弊卽叢生至乾隆七年經總  
督那蘇圖奏明復設鹽官招商認辦將盈餘銀兩酌中  
定額作爲溢課此溢課十四萬餘兩之所由始也一正  
一溢部中按銀頒給引目每年發給正額引五十四萬  
五千六百六十二道盈餘引四十萬一千四百二十三  
道商人領引運鹽分東西南三路福甯一府建甯之松

溪政和兩縣福州之羅源古田屏南三縣在會城東北  
者爲東路延平建甯邵武三府在會城西北者爲西路  
福州之閩縣侯官等縣及興化泉州漳州三府永春龍  
巖二直隸州在會城西南者爲南路東南兩路謂之擔  
引每引載鹽一百斤征課銀一錢五分惟漳州屬之龍  
溪南靖海澄長泰平和及龍巖漳平甯洋八州縣每引  
征課銀二錢三分二釐至東路所行細鹽每引征課銀  
七分五釐西路謂之篷引篷引船也西路地居上游祇  
建水一溪沂流上達灘高路狹皆用小船挽運因此得  
名每引載鹽六百七十斤征課銀二兩八錢三分三釐

鹽法議畧 卷二  
零三路以西路爲大宗西路尤以邵武府之光澤建甯  
兩縣爲精華蓋通省課額三十萬兩而西路三府應完  
二十五萬兩有奇二十五萬之中而光建兩縣應完十  
六萬兩有奇二縣額大課重實居全省之半福建鹽務  
所以最重光建幫也課既定額將長價錢水兩項裁去  
浮濫編入額征每年征長價銀二萬六百五十九兩零  
征錢水銀九千八十五兩零此外尙有應征鹽規引費  
及額外盈餘名目鹽規者各州縣所收商人規禮乾隆  
十年經總督馬爾泰奏明年定鹽規內酌留津貼州縣  
辦公撥補委員薪水外餘銀充公每年征銀四千九百

二十兩引費者卽部中刷辦鹽引之紙硃銀也每引三  
釐共征銀三千一百六十六兩零額外盈餘者各處報  
完正溢兩課外多銷鹽斤照則納課年無定額惟古田  
羅源漳浦惠安等縣報完銀八百八十一兩零臺灣府  
約完銀一萬餘兩統計閩鹽正溢雜課共銀三十四萬  
七千七百餘兩而坵折帑息不與焉坵折卽竈課也鹽  
田所納錢糧謂之鹽折坵塌所納錢糧謂之鹽坵閩省  
近海之縣十有一統煎曬之場十有六在福清縣者曰  
福清場江陰場福興場在莆田縣者曰莆田場下里場  
前江場在晉江縣者曰潯美場在同安縣者曰浯州場

鹽法議畧 卷二  
祥豐場在南安縣者曰蓮河場在詔安縣者曰詔安場  
在惠安縣者曰惠安場在漳浦縣者曰漳浦場凡此八  
縣所轄之場曬滷成鹽而迤於東南沿海之地此外如  
甯德縣之漳灣場羅源縣之鑑江場霞浦縣之涸管場  
其地漸折而至於極東其鹽皆煮海所成形質較細故  
謂之細鹽場以上十六場皆設場官主之臺灣府尙有  
五場在嘉義縣者爲洲南場洲北場瀨東場在鳳山縣  
者爲瀨南場在臺灣縣者爲瀨北場鹽皆出於曬其地  
在省東南孤懸海外故場無場官各曬丁自行設立頭  
目按年輪值名曰甲頭商人辦鹽不領引目其鹽祇行

銷本府及噶瑪蘭一廳鹽課雖在額征之內亦不解鹽  
庫就近抵充臺餉一切鹽務由臺灣府經理曬鹽之場  
有鹽坵鹽埕鹽坎鹽漏之分疊土作埂四圍周築名爲  
鹽埕以埕截而爲坎以坎折而爲坵名雖異而實則同  
卽曬鹽之池因地異其制耳至於鹽漏則空土爲窟其  
下承以溜池擇鹹鹵之地刮取白霜實之於漏沃水淋  
之滲入溜地再淋之滷卽可用挹入埕坎日暴成鹽煎  
鹽之法築土爲斛畝於竈旁以盛滷接以竹管注之旋  
盤如畝澮之流盤用篾織以蠣灰塗由盤注之於釜釜  
上亦織篾爲釜牆周圍繞之堅以蠣灰蓋取其受滷之

鹽法議畧 卷二  
多海物異名記云編竹爲盆熬波出素南越志所謂織  
篋爲鼎和以牡蠣卽指此而言也其煎鹽三場與臺灣  
五場皆無竈課惟曬鹽十三場征坵折銀一萬四千五  
百五十六兩零專款解部莆田縣應征賤引五百三十  
七兩一錢賤引者竈丁本應辦鹽以供商支其遠於海  
濱不諳辦鹽者折銀交商另行買鹽嗣商裁革此款本  
經豁除其後濱海竈戶情願完交以充公項想緣其地  
又可以產鹽也至於帑息惟曬鹽帑本銀十三萬兩不  
征息銀其餘款目繁多共帑本銀八十餘萬兩每年征  
息銀九萬餘兩以閩鹽三十六萬兩正雜課銀帑息幾

至十萬商之疲乏多緣於此現抽釐課銀四十餘萬兩  
或謂已加增於前其實猶是當年額征之數耳其運鹽  
掣驗則以三關爲要海運場鹽進省港者由浦下關掣  
驗赴泉州府者由南水關掣驗赴漳州府者由石瑪關  
掣驗皆設有大使主之至西路鹽船過浦下關後所歷  
西河水口延平建甯等關皆有盤驗而水口一關爲東  
西路之分界稽查尤嚴此福建鹽務成法可謂詳且備  
矣無如日久廢弛緣法滋弊如發帑本以養竈原以防  
其賣私也久則半歸無着發帑本以借商原以寬其營  
運也久則空賠利息場官不問煎曬弁丁甚至庇私南

路各幫多鄰近場竈私鹽充斥商不能運則改爲官辦又謂之縣澳幫縣澳者以鹽歸州縣辦理而閩清縣所屬有壺江一澳蓋海島上之村落也於是閩鹽遂分爲官商兩幫官幫滯銷則歸於西商勻代惟縣澳課輕西路課重商幫既運課輕之鹽部中卽議陞西路之課課重利微商銷亦滯一商倒歇則責令眾商代運一年欠課則責令分年帶完負累愈重商力愈不能支鹽商成爲危途遂流而爲僉商之舉僉商者卽舉報富戶充鹽商也每僉一商地方官擇殷實之家肆意婪索谿壑旣盈然後以一二戶塞責鹽務之弊莫甚於此維時小司

農王雁汀閩人也深悉其弊因奏請捐免充商上戶捐銀三萬兩中戶捐銀二萬兩給予山東司員外主事職銜永遠免充鹽商然捐者亦屬寥寥河東捐免充商之案卽源於此西路倒懸篷額無商接充經總督奏明捐輸運本銀十八萬兩委員代辦名爲官運初稍稍獲贏餘繼則半歸私橐積至咸豐年間閩省軍務漸起不但官商兩幫欠課纍纍卽西路之官運者亦被匪焚搶失去本銀三萬餘兩而下游一帶明目張膽持械拒捕之梟販乘間竊發閩省鹽務遂不可問矣至同治四年閩疆肅清鹽務大可整頓但歷年積欠至一百數十萬兩

鹽法議畧 卷二  
且二三兩年正溢課銀全未報完若不劃清界限一切難於措手此恪靖伯所以有奏請改票之議也先爲釋其逋累將新舊欠款全行豁免更爲刪其冗費將上下陋規嚴行禁除以鹽道之票代部頒之引西路舊有商運者以引商改爲票商縣澳原歸官辦者以樸戶作爲販戶樸戶卽館伴之別名也州縣辦鹽勢難親身經理皆包於館伴承辦閩言謂之樸戶耳至各路課額輕重悉照舊則裁去雜課名目但完正課銀一兩加收耗銀一錢外抽釐銀五錢課耗於領票時交納釐銀則在行銷地面設卡抽收現在西路課重之地改抽釐銀四錢

惟浦南莆田永德田南各幫尙歸官辦臺灣一府照舊行運僅按新章抽釐其餘一律改歸票運撥師船以杜私梟設官行以代總商初屆一年期滿報收課釐銀四十萬餘兩以外收舊鹽課等項銀十九萬餘兩聲請著爲定章部中卽以四十萬兩定爲正課以十九萬餘兩作爲餘課但所謂餘課多係二三兩年商人已運之鹽應完課銀以後完清卽無所謂餘課矣故二屆一年期滿僅報收餘課銀三萬餘兩然正課收至四十六萬餘兩此與當初年清年款之數恰適相符以後卽全歸票運大約所收亦不過此數矣夫各省鹽務疲敝皆由於



鹽法議畧 卷二  
積累過重不獨閩省爲然一旦豁除蓋向來未有之曠  
典也此如病人釋去沈疴卽不事更張亦可大有起色  
況抽耗抽釐較之應完雜課帑息之數亦有減無增此  
下令之所以如流水也若能奉行不怠當爲數十年之  
利惟廢部引不用亦所謂千慮一失者矣

廣東

廣東產鹽三十五場共征場課銀一萬四千八百八十  
一兩零廣州府屬爲東莞場歸靖場香山場海陸場惟  
東莞兼產生熟鹽其三場專產熟鹽惠州府屬爲淡水  
場碧甲柵大洲場墩白場白沙柵石橋場海甲柵小靖

場潮州府屬爲招收場河西柵隆井場惠來柵東界場  
海山隆澳場小江場俱產生鹽肇慶府屬爲雙恩場東  
平場高州府屬爲電茂場博茂場茂暉場丹兜場雷州  
府屬爲武郎場蠶村調樓場新興場瓊州府屬爲大小  
感恩場臨川場博頓蘭馨場三村馬裊場新安場陳村  
樂會場俱產熟鹽凡言柵者皆係自大場分出場有場  
官主之柵則委員經理焉惟瓊屬各場四面環海遍地  
產鹽俱係竈丁自煎自賣並不配引征餉亦不設官場  
課歸州縣征解羈縻之而已各場濱海皆係沙田其收  
沙曬滷專以海潮爲期潮汐與月盈虧每月祇有初一

鹽法詳錄 卷二  
十六兩次平日將沙田耙鬆其旁掘成濠溝俟潮水至  
引水入溝把灌沙田漬曬三四日將水放出沙復翻鬆  
風日曬乾卽起鹽花一遇天落水至則清曬皆不成功  
天落水者粵人所謂雨也故陰雨過多場鹽卽缺產焉  
鹽花旣結將沙收起實之於塼其塼或以木製或用土  
築皆編竹篩爲底使通氣下注仍沃潮水淋之卽成滷  
可以煎曬其曬鹽則挹滷水於池暴曬成鹽池用石鋪  
砌甚爲精潔大概夏秋日燥一日可一收春冬日柔須  
三四日一收其煎鹽則有竹鍋鐵鍋之分鐵鍋不能甚  
大一竈架鍋三口引通火氣使之齊燃煎方迅速竹鍋

大者周圍丈餘小者亦六七尺用竹篾編成塗以牡蠣  
另用鐵條數幅支架使之骨立其受火處以白蜆殼灰  
盪五六分厚卽能敵火不至焚燬想蜆殼得水之精故  
耳實滷於鍋加柴燒煮約五六時卽可成鹽至鹽將成  
時卽點用麻仁或點用米粉各場不同此與淮南煎鹽  
用阜角同法然物性亦因地而異矣其行銷則廣東廣  
西兩省福建之汀州一府江西之南安贛州二府甯都  
一直隸州湖南之桂陽郴州二直隸州貴州黎平屬之  
古州一州從前劃分引地今未有改也其配運則除瓊  
雷兩屬產鹽無多供本處行銷外其附近省河各場產

鹽由運司經理艚船發給旗程程卽船照也載明運某場鹽共若干包運往某處以備沿途盤查運至東匯關存入東倉供商捆運其附近潮橋各場產鹽由運同經理艚船發給旗程運至廣濟橋存入公倉供商捆運關上橋上皆設有專官以司澆洗成色及掣驗等事其各商自行赴場配運則稟明運司運同發給旗程運到橋關由官掣驗分銷各埠粵人所謂埠卽商人所開之鹽館也惟高廉二府離省遙遠廉鹽由該府運至石康中屯二館供配高鹽則由商人稟明該府自行赴場配運掣驗稽查卽由府委員經理在潮橋配鹽者惟潮州一

府汀州一府南安一府甯都一直隸州贛州府之興都等八縣共計二十九埠其餘則統歸省河配運焉至於引餉則較前加增數倍矣 國初廣鹽行大引四萬二千六百七十道每引載鹽二千一百斤征課餉銀二兩八九錢或三兩五分不等共征餉銀十二萬餘兩嗣因南贛各屬逼近淮岸將引一萬五千一百道改照淮例行鹽其餘引二萬七千五百七十道仍行大引至康熙三十一年經鹽政奏明一引剖作十引每引行鹽二百一十斤又因除去割沒名色每引加鹽二十五斤割沒者商人運鹽掣出多斤將鹽割沒仍照律議罪嗣知有

鹽法議畧 卷二  
名無實故明定加鹽二十五斤加課銀二錢五分自兩淮始廣東則比兩浙上則之例加銀一錢此粵引行鹽二百三十五斤之所由來也嗣因連州樂昌仁化三埠暢銷加引一千道增餉銀五千六十一兩零三十二年將海潮揭等七縣茶鹽餉銀五千三十兩零加配引一萬四千二百七十一道廣濟橋鹽餉銀四萬五千二百四十二兩零加配引十二萬八千三百四十八道又高雷廉三府當初行鹽原無引額加配引八千一百八十二道又連山等九埠加引三千二十道增餉銀一千三百六十七兩零又因沿海各處網魚增漁引八千七百

道每引征餉銀一錢五分歸善陽江二埠增漁引一千八百五十道當初鹽政以場鹽旺產曾經奏請每引加鹽七十斤加餉銀一錢五分戶部以銀數太少駁令加增嗣因商人堅執苦累情願加課不願行鹽故至三十五年將通綱應加鹽斤另配新引十二萬七千六百三十四道增餉銀五萬一千九百八十一兩零將漁引應加鹽斤另配漁引五千七百十二道增餉銀八百五十六兩零三十六年因永安縣向無引額加配引一百二十道每引征餉銀二錢五分零又因海山隆澳地方有場產鹽以致鬻私經商人認辦增漁引三百道征餉銀

鹽法議畧 卷二  
四十五兩至乾隆二十四年 欽差戶部侍郎吉慶  
查辦以廣東正引之外運銷餘鹽征收羨銀款目繁多  
容易混淆將餘鹽改配引十七萬六千六百九十五道  
增餉銀十四萬八千二百三十四兩零其征餉科則每  
引少自二錢五分零多至九錢數分零不等惟廣西桂  
林池西各府屬征銀一兩二錢零南贛各屬每引載鹽  
二百六十四斤征餉之外加征篋稅餘費然亦不過一  
兩之數通計粵鹽實行銷引七十八萬一千七百七十  
八道征餉課銀五十七萬六千六百十八兩零內廣東  
銷引四十四萬八千零八道餉銀二十七萬七千八百

九十兩有奇廣西銷引十三萬八百五十九道餉銀十  
三萬三千五百五十七兩有奇汀州府銷引七萬八千  
二百五十二道餉銀四萬六千七百九十五兩有奇桂  
榔二直隸州銷引六萬四千五百三十六道餉銀六萬  
四千一百五兩有奇古州銷引五千九百六十六道餉  
銀三千九百四十兩有奇現在廣東每年領引八十一  
萬道蓋有餘引在內也至歷來辦法則發帑收鹽改綱  
改所凡屢變矣康熙初年粵商係里下報充三年一換  
名爲排商弊端百出嗣將排商之費一萬一千餘兩歸  
入正課舉報殷實之戶充爲長商然有場埠之分場商

鹽法詳錄 卷二  
出資以收鹽埠商運鹽以行銷惟場商資本微薄竈戶所產鹽斤不能儘數收買以致場多賣私康熙五十七年裁去場商由運庫先後籌出帑本銀三十六萬餘兩分交場員竈戶產鹽顆粒皆官爲收買官置艚船二百七十餘號發給水脚運回東關潮橋存倉候配埠商在關在橋配鹽按包納價除去成本水脚獲有盈餘名爲場羨每年約四五萬兩粵鹽出場例定一百五十斤爲一包春夏每包加鹽十五斤生鹽以四斤作滷耗熟鹽以五斤作滷耗秋冬每包加鹽十三斤生鹽以三斤作滷耗餘騰鹽斤是爲子鹽發商運銷獲羨解部名爲子

鹽京羨每年約二萬八千兩至配引之外多收餘鹽發商行運名爲餘鹽羨銀嗣後餘鹽改引將餘羨十四萬八千二百三十四兩零歸入餉額粵鹽辦羨卽自此始此所謂發帑收鹽也埠商運鹽多係先鹽後價且素非殷實行之日久積欠累累以致前發帑本全歸懸宕倒革各商至五十餘埠之多推原其故緣粵商多係土著鮮諳行鹽每充新商眾商視爲弱肉可啖互相充賺不數年卽敝至乾隆五十四年經總督另籌辦法除潮橋二十九埠課餉清完勿庸更張外將省河一百五十埠總而爲一勸諭殷商共湊捐銀一百四十萬兩先將前

鹽法詳錄 卷二  
發帑本銀三十六萬餘兩如數提出繳庫永不動用其餘交存運庫作爲鹽本於出資商中擇老成練達者十人總司經理在省城設立總局更按四面埤地總匯之處分設東西南北中平六櫃中櫃設於三水北櫃設於韶州東櫃設於小淡水廠西櫃設於梧州南櫃設於梅篆鎮平櫃設於平江口埤地各就所近分隸六櫃官置艚船亦交總商管理凡各場產鹽皆由總商領出鹽本運回省河收存河南金家二倉分運各櫃埤商向各櫃買運皆先交價餉然後發鹽不准絲毫蒂欠其各櫃銷鹽多寡由總商每月報明運司稽查至容易走私地方

如虎門紫泥廠桅甲門焦門四處飭令總商設立巡船召募巡丁協同守口員弁查緝所有原設盤查鹽船之三水韶州兩關概行裁撤倒革各商未折積引令總商代爲拆運以完課餉無著帑息令總商捆運餘鹽以彌積欠凡一切應完餉羨皆責十人肩承而散商不與焉此所謂改埤歸綱也總商雖司經理但各人並無應銷埤地未免又視埤商爲二原議埤商向櫃買鹽本有定價嗣則因用度浩繁每包多收辛工銀一錢五分藉口彌補帑息每年不問正引折完與否貪銷餘鹽反致有礙正引地方官發艚船二百七十餘隻任令損壞並不

及時修理埠商銷鹽仍係自行僱船赴場裝運且課餉捐輸應酬皆總商之責每有疲埠欠餉及捐輸措辦不及輒用鹽本墊解行之不十餘年雖正項年清年款而鹽本卽虧至六十餘萬之多雖經總商分限認完迄未能依限交納嗣後仍係埠商按引捐輸歷年始能彌補清楚而此十人者已半物故家產蕩然矣故至嘉慶十七年經總督奏明總商在局經理徒資糜費毫無裨益裁去總商卽於埠商中之老練者選擇六人經理六櫃事務彼皆各有埠地自顧已貲不至濫行開銷仍定爲三年更換一次免其盤踞把持將省城總局改爲公所

現在廣東領引配運責成六櫃總商有埠之商自運自銷無埠之商另招水客運銷官不與聞焉此所謂改綱歸所也歸綱歸所以後收鹽雖不發帑然所辦羨銀尙多粵鹽運至西省每包申出鹽十八斤十二兩嗣又添買餘鹽一萬包發埠運銷按九折較羨是爲秤頭鹽羨約二萬七八千兩慶遠等五府新闢苗疆土司食鹽並無引額皆捆運餘鹽交鄰近各埠帶銷是爲土司鹽羨約五千餘兩海船運鹽竈戶貼補船戶耗鹽橋上官爲收買發商運銷是爲花紅鹽羨約四千餘兩粵省鼓鑄歲資滇銅十餘萬斤滇省廣南府屬歲資粵鹽九萬餘



鹽法議畧 卷二  
包每年各省委員辦運至百色地方交換謂之銅鹽互  
易及廣州駐防食鹽育嬰堂鹽各數千包皆取之餘鹽  
按包計羨歲無定額蓋出本收鹽配引之外常有餘鹽  
藉以辦羨以充外支經費故額引獨無雜課名目惟正  
餉百兩加收部飯銀一兩五錢平頭銀三兩三錢每引  
征紙硃銀一分二釐以爲運司養廉及解餉領引之用  
此外廣東黃江廠清遠廠遇仙橋太平橋洽光廠等處  
鹽船經過每包抽稅銀六釐或一分數釐不等約收稅  
銀四千數百兩西省抽稅銀四萬餘兩船頭銀一百四  
兩其帑本則八旗生息滇省練本廣西捕費等項共銀

七十萬餘兩每年應完息八萬餘兩以上各項從前卽  
歷年拖欠不計其數自埠地被擾未嘗分釐報完而正  
餉亦積欠四十餘萬焉惟其奏銷稽歷四年之久則其  
暗中虧餉亦不下二百數十萬兩故鹽務奏銷爲一大  
關鍵也當初奏銷原係甲運乙報自嘉慶二十三年因  
省河捐款過多奏銷展限省河潮橋遂分爲兩屆奏銷  
至道光二十四年以後潮橋疲滯甚於省河因而迭次  
請展現在同治七年省河報至同治三年潮橋報至同  
治元年今年潮橋又請展十個月歸并餘引餉課在內  
計省河奏銷引六十萬九千一百五十二道征餉銀五

十一萬三千二十九兩零潮橋奏銷引二十萬五千三百五十八道征餉銀十二萬九千二百八十九兩零雖勉強報完然如此遞年推展伊於胡底似亦當思所以變計矣粵東廣南韶惠潮羅連嘉五府三州廣西懷集一縣俱產鐵斤鐵政亦歸鹽官管理凡商人運鐵先報明運司發給照票每票以十萬九千斤爲率不及十萬斤者聽從商便如告運一萬斤先具單赴運庫完納軍餉銀三兩鹽餉銀四錢牙稅銀一兩加餉銀六錢共銀五兩又每萬斤六十吊每吊抽銀五釐共銀三錢每萬斤餘鐵二十斤納餘價銀四分二釐庫大使填給庫收

繳司發給實收運票凡運鐵一萬斤除完餉外納部規銀三兩四錢稿差銀七錢納鐵規銀十九兩小禮銀一兩九錢皆造入鹽務奏銷冊內移解藩庫作正開銷其採鐵之法以山木爲驗嶺南隆寒之時木葉不落惟產鐵之山樹則早凋其山亦時流黃水以是求之百不失一蓋天下產鐵之區莫良於粵而冶鐵之工莫良於佛山故鑪座之多以佛山爲最至今有商人新開鑪座總督猶專咨達部焉廣東鹽鐵並誌蓋亦祖漢代鹽鐵論之遺意云爾談鹽法者多謂莫善於票莫不善於商然軍興以來廣西之亂甚於湖北淮鹽數百萬之課全棄

鹽法議畧 卷二  
於地粵鹽數十萬之課十得八九由此觀之商票之利  
弊較然矣夫行商滋弊皆不恤商之故於商乎何尤粵  
商之困敝久矣如得閩鹽辦法釋其重累節其浮費有  
不淳然興起者未之有也豈必待改絃而更張哉

### 四川

蜀古未有鹽也前代多以解鹽易蜀茶宋史皇祐四年  
載范祥置制解鹽舊禁鹽地一切通商聽鹽入蜀公私  
稱便熙甯七年載熊本討瀘夷降之於是涪井長甯諸  
夷皆內附註云涪井在敘州府長甯縣北泉有二脈一  
鹹一淡取以煎鹽宋初爲涪井夷所據後置監於此此

蜀鹽見於記載之始然亦所產無幾不能及遠 國朝  
雍正初年河東鹽池猶歲辦川鹽五萬席運蜀行銷嗣  
後蜀人識泉脈者始漸闢鹽井遍於各州縣在成都府  
屬之簡州者五百三十三眼重慶府屬之榮昌大足合  
州涪州銅梁者二十一眼忠州直隸州者三十四眼保  
甯府屬之閬中南部者四百四眼順慶府屬之南充西  
充蓬州者六十眼綏定府屬之大竹城口廳者四眼敘  
州府屬之富順者三百八十二眼夔州府屬之大甯萬  
縣雲陽開縣者一百四十六眼甯遠府屬之鹽源者二  
眼嘉定府屬之樂山犍爲榮縣威遠者一千六百六眼

鹽法義舉 卷二  
潼川府屬之三台射洪鹽亭遂甯蓬溪中江樂至安岳者五千四十六眼瀘州屬之江安者一眼綿州直隸州者一百五十九眼資州及所屬之井研仁壽內江資陽者三百六十二眼西陽州屬之彭水者十四眼井之深者百餘丈淺亦數十丈井眼甚小不能容人皆以綱鑽累接寸鑿而下之每鑿一尺須以木圈周圍托其裏以防客泉故闢一井工以數年計費以數萬計非強有力者弗能爲至滷泉之衰旺用年之多寡則地脈爲之人無可爲力一遇泉底滯塞修理非易閒有井眼稍大可以縋人而下者亦以太深之故重陰逼人每至致命惟

天微雨藉雨點以通陰陽之氣稍可施工後有智者於井置木盤徧鑿密空實水其中如微雨狀始能連日工作各處情形雖有不同大概修井與鑿井等焉井透滷湧以竹筒汲之煎之於釜自然成鹽其釜大者千餘斤煎鹽有巴鹽花鹽之分花鹽者散碎如雪水氣大而耗多宜銷於平原居民巴鹽者堅凝如冰水氣淨而耗少宜銷於山陬邊境花鹽一日夜煎兩伏火得鹽二百斤巴鹽三日夜煎一伏火得鹽五百斤故其價值巴鹽嘗高於花鹽十餘文焉煎鹽用煤者多潼川府厥則用草其地泉脈稍淡汲滷於井煎之使鹹潑浸於草灰中另

鹽法議畧 卷二  
以井滷漉之前方成鹽是鹽以再煎而成也獨敘州府之富順嘉定府之榮縣則皆有火井其井鑿之之難同於鹽井鑿透時火苗自生然以氣成不得凡火不然井口覆以銅帽四面穿空以竹筒按而引之一井之火可供數十竈之前井火竭時間或出油卽所謂猛火油也咸豐年間曾有鑿火得油者其油入水能然得風愈烈每斤價值不過七八十文故於江中剿賊藉以取濟造物生物不測其信然矣井之出滷多寡懸殊或一井足供數十鍋之用或一井不敷一鍋之用且煎鍋一口須本數百金往往有有井而鬻滷於人者亦有置鍋而買

滷以前者故起課或以井計或以鍋計以井計者八千八百三十二眼以鍋計者五千三百六十九口皆分上中下三則上井征銀三十餘兩二十餘兩不等中井征銀十餘兩數兩不等下井征銀一兩至數錢不等上鍋征銀五兩中鍋征銀三兩四錢下鍋征銀二兩惟鹽源縣煎鹽則以竈計共竈六十六條半所謂條者猶一座也每條征銀十三兩二錢通省共征井鍋課銀一萬四千九百六十一兩八錢七分三釐此川鹽之竈課也蜀人不諳行鹽產鹽旣多卽有陝西大賈習嵯業者入蜀轉運行銷其行鹽疆界則四川一省九姓土司及湖北

鹽法議畧 卷二  
宜昌府之鶴峰長樂二州縣施南府之恩施宣恩咸豐  
來鳳利川建始六縣貴州之平越都勻石阡遵義思州  
黎平貴陽安順興義思南大定十一府威甯平遠黔西  
三州清鎮婺川畢節三縣先後請部頒水引三萬一百  
七十八張陸引十三萬八千二百二十九張水引多行  
於黔楚而腹地少陸引多行於腹地而黔楚少行銷黔  
楚者謂之邊行銷腹地者謂之計岸引言其計口授  
食有定岸也水引載鹽五千斤征課銀三兩四錢五釐  
陸引載鹽四百斤征課銀二錢七分二釐四毫每正鹽  
一百斤皆加耗鹽十五斤其行銷黔省者另行就黔征

稅每年征銀七千一百十三兩三錢一分有奇遇閏加  
征銀五百九十二兩七錢四分有奇歸入黔省造報不  
在引課之列引課共征銀十四萬四百九兩六錢此川  
鹽之正課也川鹽起課最輕每斤不及一釐蜀行茶引  
舊例征羨截羨卽羨餘截者於繳引截角時交納銀兩  
也卽仿照茶引之例每引酌征羨截邊計水引征羨餘  
銀一兩二錢至五兩五錢不等邊計陸引征羨餘銀一  
錢二分至五錢五分不等邊水引征截角銀一兩計水  
引征截角銀六錢邊陸引征截角銀八分計陸引征截  
角銀四分之未久滯銷之區完納維艱卽經查辦將

雲陽大甯行銷川楚水引四千五百四十四張及雲陽大甯開縣行銷川楚陸引一萬二千八百二十九張免征羨餘截角雖輕然滯岸猶嫌稅則太重又將大甯石砵廳水引一千七百十三張及長樂太甯西陽州等土司鹽源縣陸引四千八百六十七張免征截角勿論邊計水陸每引征紙硃脚力銀七釐此卽部中刷引領引之費也其井鍋課銀每兩征耗羨銀一錢二分至四錢四分不等通計羨截紙硃共征銀十五萬八千五百二十三兩二錢七分四釐此川鹽之雜課也正課於次年專案題報雜課則附入茶引羨截案內咨報戶部該省

書吏巡役工食卽於羨截銀內按水引一張提銀三錢五分陸引一張提銀一分八釐約計銀一萬餘兩每年實支銷銀五千一百二十二兩餘銀移解司庫充公蓋至乾隆初年而四川之鹽務大備焉然無鹽政以總督兼管無運司以茶道改爲鹽茶道無場官以州縣代理各井煎鹽於適中之地設立廠垣產鹽皆運入廠與引商成交以犍樂富榮射蓬爲三大廠行銷各處最多其餘簡資等小廠僅配銷本州縣計引行遠者少至轉運黔邊大商則全在三大廠配鹽他廠並無邊引惟夔州府之雲陽大甯等廠逼近楚省楚引皆配二廠之鹽其

鹽色味稍差楚省素稱滯岸凡免征羨截之引楚引十  
居八九鶴峰長樂二處續增犍爲水引三百一十張其  
鹽色白味佳大礙淮綱至道光十八年卽經奏明將引  
扣留存庫應完課銀由淮南包納該二處往往商倒引  
懸由楚省委員辦運以濟民食蓋當年川鹽銷楚特其  
波及耳至本省計岸雖係按丁分引然暢滯靡常或以  
此縣代銷彼縣之引或以彼商認銷此商之鹽互相認  
代弊端叢生久之卽按其認代者著爲定額而私行認  
代仍所不免鹽井衰旺亦每數十年而一變方興之初  
潼川之射洪蓬溪最旺犍樂富榮次之其餘各井又次

之不數十年射蓬卽衰歇反以犍富爲上方乾隆之四  
十九年也各處鹽井衰歇歷年積欠井課至十餘萬兩  
蜀鹽大困有林俊者閩人也官四川鹽茶道聽民穿井  
永不加課蜀鹽始蹶而復振今日之井課猶按原額征  
解其實鹽井之多寡與冊載大不相符矣惟潼川府屬  
雖另開井眼滷旺總難如初且其產鹽花多而巴少煎  
鹽用草而工費以致黔商日形竭蹶積欠課銀至七萬  
有奇始議與犍爲黔商合總行鹽邊計和衷以十二年  
爲限至乾隆六十年合總期滿將歷年積欠歸還清楚  
潼商以著有成效呈請續合十二年以嘉慶元年爲始



鹽法議畧 卷二  
至十二年限滿年清年款毫無蒂欠潼商復掣引自辦甫經一載卽欠課銀二萬餘兩又據潼商合懇仍歸健商代行至道光八年三次限滿始飭令潼商掣回自辦而該廠產鹽愈少不敷配引仍係按年改配健富兩廠之鹽亦有將引張交健富邊商代銷屢屢虧折疲罷愈甚每年僅完正課不完羨截年復一年拖欠累累而漢州茂州巴州劍州蓬州什邡射洪鹽亭平武江油彰明石泉營山儀隴新甯閬中通江安岳羅江安縣綿竹德陽梓潼南江西充井研銅梁大足定遠榮昌隆昌三一州縣亦因滷衰銷滯商倒岸懸無人接充民間自在

附近竈廠買鹽而食正雜課銀公議歸入地丁攤征矣蓋鹽商習尙奢靡加以官吏陋規日增月益不數十年大半家貲蕩然領引到手無力運鹽始另覓殷實之戶代爲運銷而收其租名曰號商號商旣出租於引商而所完課羨又須交引商自行封納引商往往私自挪用延不交庫且蜀鹽正課最輕有商未折引官顧考成代爲墊完正課者有引未銷鹽商力尙可支先爲預完正課者此項積引旣交正課不能勒令繳殘商人卽藉此影射重照停閣新引官吏亦視行銷積引爲利藪任其折配以舊間新當年之額引銷路愈滯此蜀鹽受弊之

源也大概嘉慶二十四年以前雖時盛時衰課羨尙皆清完二十四年以後卽商力日乏欠項日多積至道光三十年幾於全綱頽廢岌岌不可終日矣始徹底清查共積欠羨截銀二十三萬七千餘兩共未繳殘引二十二萬八千五百八十一張傳齊眾商公同集議酌量商力之厚薄口岸之暢滯分撥認代勻銷統限以十二年彌補全完不準再行推展號商旣經辦鹽卽將姓名列入官冊課羨責令自行封匭勿庸再交引商以免輾轉挪虧其時惟健富兩廠邊商及成都華陽兩縣計商稍爲殷實銷岸亦暢其餘各廳州縣皆形疲滯而潼商之

疲滯尤甚故查出通綱積欠銀二十三萬七千餘兩之內潼商卽欠十三萬有奇總緣其強行邊引虧累日深於是將潼商額行黔邊水引二千五百二十二張撤出交健爲邊商一千二百三十七張交富順邊商一千二百八十五張該二廠產鹽甚旺商亦綽有餘力令其代辦運黔行銷惟黔邊口岸雖定有額引數目並未分晰某州某縣引若干張當初邊商皆在黔蜀交界設店發賣嗣則漸入黔省腹地各占口岸以致互相侵越訐訟不休委員查勘運鹽道路情形提集健富兩商公擬劃清界限作爲定岸令健商行黔水引一由敘永一由涪

鹽法通考 卷二  
州龔灘分運黔省安順大定興義普安思南石阡鎮遠  
思州等府廳銷售其分給代辦之潼引由涪州挽運至  
龔灘轉運思南石阡鎮遠銅仁思州又由婺川之王家  
沱轉運婺川縣銷售富商行黔水引一由合江一由碁  
江一由涪州分運黔省貴陽遵義都勻正安等府州銷  
售其分給代辦之潼引由涪州白馬鎮陸運正安水車  
等處又由彭水縣江口陸運濯水關直達平越都勻等  
府州銷售健商婺川引鹽從王家沱起運不得侵富商  
白馬江口地面富商由白馬進運正安水車引鹽只許  
在馬頭山過道不準設店酒賣其由江口進運濯水關

直達平越都勻引鹽不準在婺川地面開包掛秤口岸  
既清卽按其認定某州某縣於邊引上另蓋墨戳然後  
發商捆運其毗連處所各自擇隘設卡互相稽查榮縣  
邊商向與富順共岸仍循其舊至各廳州縣疲滯情形  
雖不相同然大要不外於私充官滯因定爲稽火伏加  
斤重嚴關隘勒繳殘以杜私鹽之源蜀場本無場官竈  
戶自煎自賣走私者多委員會同州縣將竈戶編立保  
甲某戶井鍋若干口煎鹽若干斤配引若干張隨時稽  
查令呈報登籍按月由州縣造冊申報一次則場私淨  
矣蜀鹽每包正鹽百斤加耗十五斤包索二十斤向以

一百三十五斤爲一包商人因銀價昂貴私行加重二百數十斤不等相沿既久驟難裁革酌定巴鹽以一百六十斤成包花鹽以二百斤成包水引載鹽五十包花鹽一萬斤爲定額巴鹽八千斤爲定額陸引載鹽四包花鹽八百斤爲定額巴鹽六百四十斤爲定額掣出餘鹽照私鹽例治罪則引私清矣鹽船過關本有稽查其夾帶私鹽向有帶手鹽赤膊鹽丁口鹽等名色關吏得賄放縱習爲固然現與嚴定章程如遇前項私鹽立即拏送治罪將逐日驗放商號船隻引鹽包口斤數五日申報一次與場員所報之冊互相磨對如有不符或經

委員查出賄縱情弊官卽參撤吏則重懲則鹽船不得肆其夾帶也鹽課奏銷以後卽當隨繳殘引惟蜀鹽相沿奏銷之時課雖墊完而引尙未折此項積引卽按引補運已屬有礙新綱況商人藉此重複影射百弊叢生從前積引既經清釐以後凡經奏銷勒限一年卽令繳殘如不申繳作爲廢紙不準再行運鹽則殘引無所用其影射也各衙門冗費原因商人舞弊始而餽送繼成勒索每引或至數錢不等商弊旣除官吏自無從挾制將上下陋規全行裁革以紓商力蓋至是而蜀鹽之法漸密蜀鹽之弊一清實力奉行當可大有起色乃不數

年卽值淮鹽不通黔邊滋事蜀鹽全注於楚而其局一大變矣當金陵失陷長江梗阻也淮鹽片引不到楚岸鹽價踊貴每斤值錢百餘文雖議借浙鹽借川鹽改運道迄無成功而川中梟販因而乘之皆千百成隊排列抬鎗大炮連檣東下官吏無可如何咸豐四年八月始輯而柔之於宜昌府設局抽收釐金每斤抽銀一釐五毫行之年餘僅抽銀二十餘萬兩嗣於荊州之沙市設立分局凡川鹽入楚先在宜昌局抽釐二文五毫其運至荊州沙市發賣由行店於買戶名下抽釐錢四文五毫一賣一買之中共抽釐錢七文合銀三釐五毫每月

約收錢七八萬串不等未幾卽值川境不靖井竈半遭蹂躪不甚暢旺且楚軍圍攻安慶需餉甚殷又於咸豐十一年將沙市鹽局酌加釐錢二文宜昌鹽局酌加釐錢一文爾時銀價在制錢二串以外宜昌應完釐錢三文五毫令商人交紋銀二釐及銀價低落又令商人折交制錢五文以錢易銀局員頗沾餘潤故鹽釐報部宜昌以銀計沙市以錢計以錢合銀每年總在八十萬兩上下迨同治三年克復金陵以後規復淮綱又議重抽川釐以爲淮鹽進步之計於沙市鹽局酌加釐錢三文宜昌加釐錢二文所收加釐半濟楚餉半撥淮南收支

通計每斤宜昌抽釐錢七文沙市抽釐錢九文五毫抽釐之初宜昌卽每斤別抽錢一文沙市每斤別抽錢五毫作爲局員公費共抽釐錢十八文而川鹽之暢銷如故惟自宜昌至沙市水程三百六十里中間如宜都枝江洋漢董市江口高家套太平口沅市窑灣九處皆支港分歧雖設卡稽查仍多偷漏同治六年將沙市局歸併宜昌總局宜昌爲川鹽入楚要隘萬難飛越凡川鹽到局卽將應完釐錢十八文一併提取發給水程開艙銷售沙市爲水路通衢盤隄過載之鹽甚多但於此設卡稽查其宜都九處分卡全撤以節糜費並於宜都上

游之巴東縣設卡掛號於平善壩設掣驗廠江水發時則改由屯甲沱掣驗鹽船先由巴東掛號報明包口斤數發給艙單至廠過掣然後入局按數抽釐顆粒不能走漏所收數目按季奏報一次每季約制錢五十萬餘串文其一文五毫公費每年約收錢二十萬串一半提歸正款充餉一半爲釐局經費由外支銷此湖北抽收川釐之源委大畧也其本省抽釐自咸豐五年始當蜀鹽運楚額引必不敷用議設聯三照票凡餘鹽運楚皆先照章完課發給照票以爲憑據令出再三商販置若罔聞而私運如故乃於夔關設卡抽釐凡無引餘鹽每

鹽法議畧 卷二  
百斤抽銀一錢三分大甯一廠在夔關以下其餘鹽入楚在於巫山縣之空望沱設卡一律抽釐每年約收銀十二萬餘兩此夔巫釐卡但抽餘鹽者也楚價昂貴蜀鹽獲利頗厚初議酌量加課商皆觀望推諉委員親赴各廠勸諭商願按引捐銀一釐計水引一張捐銀八兩分爲三股認交竈戶交銀二兩七錢五分引商與號商交銀五兩二錢五分除忠州開縣雲陽大甯邊廠及歸丁州縣不計外共捐銀三十一萬一千兩此咸豐四年也次年卽改爲就廠抽釐於犍爲之五通橋富順之自流井豆芽灣蓬溪之康家渡設總局四處委正印官經

理仍按每斤一釐之數水陸引張皆計斤抽釐餘鹽每斤抽錢四文並於樂山之牛華溪上牛市富順之牛佛渡鎮溪口四隘分設巡卡委佐貳一員專司驗引收票蓬溪廠產鹽較少不必另設卡員卽委分駐梓潼鎮之遂甯縣丞就便查驗其餘簡資等小場由地方官一律照辦咸豐十年以後黔匪外擾松番內鬩川餉浩煩將各廠釐金酌量加增巴鹽每斤加銀一釐五毫花鹽每斤加銀一釐歸丁之三十一州縣向準赴各廠買食餘鹽尙多偷漏又擇各廠要隘之所創立鹽垣七處竈戶發賣餘鹽皆令至垣交易巴鹽每斤加抽錢二文花鹽

照舊揀派公正紳士協同委員會辦稽查嚴而走私少始能豐旺每年約抽銀七十五六萬兩此廠垣釐卡分抽正餘者也四川大江經過成都迤東歷眉州嘉定府敘州府至瀘州合州爲川南又東由江津縣歷重慶府涪州忠州至夔州府爲川東蜀鹽三大廠犍樂富榮在川南富榮鹽由本廠小河至鄧井關縣丞點驗放行至瀘州入大江樂山鹽由牛華溪入大江犍爲鹽由五通橋入大江均至四望關通判點驗放行順江東運射蓬廠在川北其鹽由川北小河直至重慶之唐家沱方入大江故重慶府向爲邊計引鹽運道所總匯其府經卽

攝批驗所之職咸豐十年於府城設立總局勿論邊計運楚正課餘鹽悉令赴局完釐運楚有引巴鹽每包抽錢六百五十文花鹽每包抽錢一千三百五十文無引餘鹽每包抽錢一千五百文小河所來餘鹽包口輕重不一難以按包計算則每斤抽錢五文其行銷本省計岸利息較薄按水引一張抽銀二兩完釐之後發給釐票委正印一員督率紳士經理局務另委佐雜二員一駐府城上游十里之香國寺小河來鹽在此驗船點包送報單於總局大工之鹽卽由批驗所查驗送單一駐府城下游二十五里江河會流之唐家沱專司驗票放



行局中所收釐錢按錢一千解庫平銀六錢一年約收銀二十五萬兩此重慶釐卡分別大河小河者也以上三項約共抽銀一百十餘萬兩所收銀兩皆按每銀一萬提五百兩作為局員吏役薪水數年以來惟廠垣釐金報至同治四年止重慶自奏明定章以後僅報過一次夔巫報至同治三年春季一季收銀一萬一千餘兩收數大為短絀其上游抽釐發給照票即與正引無異餘鹽少歟抑未免日久弊生也然風聞現在楚運水引一張皆帶餘鹽五千斤此項餘鹽完釐與否不可得而知之矣此川省抽收鹽釐之源委大畧也川楚釐金

暢旺如此其銷鹽可知額引理應全完乃行之十有餘年惟扣留存庫之長樂添行隄引三百一十張於同治二年有商認領輸課其歷年正引積壓至九萬餘張拖欠羨截至八九十萬兩其故何也蓋號商行引商之引先出租息自抽釐之法行餘鹽與正引無異誰肯復租引乎故銷鹽自暢正引自滯若非引商把持當可年清年款惟引窩祖父以來是其世業一旦裁撤則數百家皆將流為乞丐且餘鹽釐金重於正課多征一兩羨截即少抽一兩釐金於濟餉並無出入此亦可以存而不論者矣蜀鹽辦課正課不過三十一萬兩常有缺產之

虞今則加至二百數十萬兩仍有餘鹽此所謂失之於東得之於西 國家課賦以淮鹽爲大宗自長江梗阻三百餘萬之正供盡歸子虛非蜀鹽旺產不但軍餉無出全楚之人不幾於淡食乎天不愛道地不愛寶卽值蜀井鹽涵自生旺產異常乃 國家洪福所致非人力所能爭也淮運旣通以後若照舊章整頓淮綱楚岸鹽價必大爲跌落川鹽或可不禁自止當事者意在保價濟餉淮鹽每引抽釐至十餘兩楚抽川釐已重淮釐則又倍之復不講究養竈督煎竈戶惟利是圖每攬廢灘潮霜以充數其味苦澀人不樂食無怪乎川鹽暢銷淮

鹽反滯也夫爲政者貴因勢利導若川淮相持勢必至辦淮者袒淮辦川者袒川私鹽因而乘之今以所收川淮之釐數按斤計引仍不及當年楚岸額引之半豈果銷鹽止此數也其暗中私鹽充斥當已不少矣職榷政者其平心察之

雲南

滇蜀之鹽皆產於井蜀井鑿於人滇井則成於天焉雲南鹽井二十四區曰黑鹽井新井沙涵井新沙二井蓋附於黑井者也設有鹽課提舉司督飭黑井大使煎銷鹽九百七十八萬四千五百斤曰琅鹽井距黑井東南

鹽法議畧 卷二  
百餘里設有琅井提舉司專管煎銷鹽一百八十三萬三千三百三十四斤曰阿陋井草溪井在楚雄府東南廣通縣界設有阿陋井大使專管煎銷阿陋井鹽五十八萬八千八百五十斤草溪井鹽十七萬三千四百斤曰白鹽井安豐井在楚雄府西北姚州界設有白井提舉司督飭白井大使煎銷鹽八百七十三萬九千三百斤安豐井大使煎銷鹽三百八十二萬八千一百斤曰麗江井老姆井在麗江府之麗江縣界設有麗江井大使專管煎銷麗江井鹽四十三萬八千六百斤老姆井鹽二十萬九千四百斤曰安甯井新洪井在雲南府西

南安甯州界由知州兼管煎銷鹽二百八十四萬六千七百四十斤曰雲龍井在大理府西雲龍州界由知州督飭雲龍井大使煎銷鹽二百八十一萬五千一百斤曰只舊井在武定州西元謀縣界由知縣兼管煎銷鹽十萬六千一百二十二斤曰抱母井香鹽井在普洱府西威遠廳界由同知督飭抱香大使煎銷抱母井鹽一百九十二萬五千八百斤香鹽井鹽九十九萬一千二百斤曰恩耕井在鎮沅直隸廳界由同知兼管煎銷鹽六十六萬斤曰按板井距廳治差遠設有按板井大使專管煎銷鹽七十六萬五千斤曰景東井在景東直隸

廳界由同知兼管煎銷鹽一百六十八萬三百斤曰彌沙井在麗江府西劍川州界設有彌沙井大使專管煎銷鹽五萬七千三百斤曰磨黑井木城井安樂井在普洱府之甯洱縣界由知縣兼管煎銷鹽七萬八千九百斤曰石膏箐井在距普洱府三十餘里山箐中由知府兼管煎銷鹽九十五萬一千斤嘉慶十二年開化文山改食滇鹽加煎鹽三十六萬斤一年共額煎銷鹽三十九百四十二萬八千一百斤配大照票十萬七千九百零一張小照票十四萬一千一百五十六張大票載鹽三百斤小票載鹽五十斤徵正課銀二十六萬四千一

百八十三兩四錢七分三釐養廉銀五萬八千三百三十二兩七錢六分一釐井費銀五萬三千七百五十九兩三錢七分六釐通共正雜課銀三十七萬六千二百二十二兩六錢二分遇閏加煎鹽斤課亦隨增此滇鹽向來一定之課額也雲南久在夷服二十四井不詳始於何時多傍山依水似池而深中有滷源自涌亦或間出淡泉須修砌井身格屏淡水方可提滷入煎較煎之法汲滷以罐十六罐為一背每罐六斤濃滷可煎鹽十八兩淡者遞減至十兩為率扎較一時出滷幾背幾罐卽以定該井額煎之數井上為屋附近建煎舍鹽倉周

外圍以大隄以防客水然值大雨時行水患猶不免焉  
惟石膏箐井出於極南環山深箐之中生滷係屬礦礁  
先入釜融化鍊去渣滓再煎成鹽沙丁入井採礦皆開  
挖礦洞日久洞深兩傍用短木撐抗須裹糧張燈徇僕  
而前屈曲探鑿運至井口桔槔而上視汲滷之便難易  
懸殊并有數口引風出入呼吸相通否則礦洞火不能  
然此亦如內地之開采煤窯必須關風也同爲鹽井而  
滷源滷礦所產迥別則前人所紀西域鹽生於木生於  
草生於石者皆無足異矣滇鹽止行銷本界不及他省  
雖自元代已隸版圖而鹽引始於至正元年雲南弗與

由元迄明所用照票皆由本省刊發不頒自內府總緣  
地處極邊故一切規模皆畧而弗詳焉國初沿明舊制  
尙係鹽商認票辨運配鹽有定井銷鹽有定岸惟運鹽  
水無舟陸無車全借人夫背負則運費重煎鹽無煤炭  
無蕩草全以木柴供燒則工本重他省鹽課每斤約三  
四釐淮南至重亦不逾一分滇鹽當初起課卽以一分  
爲率則課賦亦重無三倍之利故富貲巨商皆棄而弗  
顧多僉保鄉人勉強承充往往不數年而敝商倒課懸  
無力賠繳因責之里甲按戶攤納且各井出滷盛衰靡  
常或井鹽溢產而商不能運或商力能運而井又缺產

百姓苦淡食而包納無鹽之課積至乾隆末年滇鹽蓋甚爲民間之累矣嘉慶五年革去長商改爲竈煎竈賣民運民銷無論商民皆許輸課領票運鹽不拘井口銷鹽不拘地面完課之後聽其所至各井煎鹽亦不限以例定額數某井缺產卽以溢產之井撥補但就二十四井現在煎鹽實數將向來一定課額勻算攤徵祇求於課無虧不計此贏彼絀有餘作爲溢課儘徵儘解所有放票收課各事宜卽責成井員經理俟試行二三年後再酌定各井煎銷額數以嚴督銷考成至嘉慶八年著爲定章永遠遵行前列各井煎銷數目卽嘉慶八年所

定之額也二十四井之中惟黑井白井出滷最旺未嘗淡縮一省產鹽不足四千萬斤而二井居其大半蓋滇鹽之精華也且與琅井同在楚雄界內煎鹽旣久柴薪維艱采辦須涉遠道井民力嘗不給始議由庫借給黑井銀二萬兩白井安豐井銀七千兩琅井銀四千兩以爲柴本次年於井民賣鹽價內分作四季扣還井民卽滇言所謂竈戶也嗣因琅井缺產柴本停借黑白二井遂爲常例焉滇鹽雖供一省之食富庶以來實不敷用且鹽井多在迤西迤南東方絕少東川昭通二府在東北隅界隣四川民間久已運食川鹽開化文山廣南寶

甯二府縣在東南隅界隣廣西嘗苦茹淡自乾隆四年  
卽派員赴粵采運粵鹽接濟民食惟由滇至粵水陸數  
千里委員旣視爲畏途鹽亦不能如期而至故建議者  
更令井民躡覓子井以補正井之不足然子井甚難或  
鑿獲滷源硝重不堪煎或可以煎不久卽淡卽涸非試  
辦一二年扎較定額不能報部立案維時石膏箐井滷  
礦漸豐可以加煎嘉慶十二年將開化文山改食滇鹽  
廣南寶甯仍食粵鹽甲年之運常丙年不至十七年又  
改爲銅鹽互易蓋廣東鼓鑄歲需銅斤須派員赴滇采  
運現議卽由滇辦銅由粵辦鹽廣西百色爲適中之地

惟道經剝隘三月以後泥瘴卽不能行約定歲暮春初  
爲限銅鹽皆運至百色交易而退各自運回本省似較  
前爲便矣而鹽之遲滯如故所以然者鹽務綱習凡客  
省借運必多方刁難使其跋扈各處皆然不獨廣東也  
嗣又改爲百色埠商帶運由廣南府監視收發初猶勉  
強支持道光二十年後綱敗埠懸此典久廢而不舉矣  
然廣南寶甯未聞缺鹽者終賴子井之力也子井昔亦  
有之抱母有二子井缺其名阿陋有子井曰猴井雲龍  
有子井曰金泉未知何時所開其近來開採者嘉慶二  
十五年琅鹽井民在焦石潭子躡獲子井一區扎較每

年煎鹽十九萬斤名爲生生道光二年又在附近跣獲寶興興隆賀元新興湧龍逢源六子井皆可煎鹽十餘萬斤業猴井者在附近黑井地方跣獲元興永濟二子井時因安甯井淡縮初議撥歸安甯而地勢相遠難以兼顧終歸黑井提舉管理卽爲黑鹽子井黑井本有五眼曰大東新沙復大東二眼皆正井新沙復卽子井也然向來新井沙涵井列於二十四井之中而復井不與者意其出更在後也後人所鑿之井多難經久故抱母二子井猴井先後廢棄生生井煎辦未三年卽硝重味苦無人買食寶興等六井十數年後陸續盡報淡枯而

復井亦於道光五年被淹成廢其時山水暴漲挾沙帶石大東新沙復全被填塞隄岸橋房沖刷大半賑災修工借給庫銀二萬五千餘兩井身始皆修補完整惟復井龍口傷損涵源走失因而封閉嗣後二十五年白井共四十一眼被水沖淹井身盡行坍塌借給庫銀一萬數千兩亦皆修復開煎未嘗廢一蓋老井雖經水沖沙壓涵源自在終古不做後鑿者則不能也被水之案各井時有但未嘗如此之甚凡井被災短產鹽斤須分限補煎借給庫銀須按年扣還課額并未稍虧非數年不能復元以黑井之盛被災以後歷年拖欠柴本至八萬



鹽法詳錄 卷一  
餘兩惟恃元永二子井出滷日暢與正井相埒挹彼注  
茲始能復振故黑白二井爲滇井之精華元永二井又  
子井之精華也以外子井惟金泉尙在然亦出滷日淡  
其餘試辦旋停未經報部者不知凡幾惟未開子井以  
前滇鹽苦於缺產既開子井以後滇鹽又苦滯銷緣內  
地及宣慰司所屬夷界私開者眾跌價搶售大礙正鹽  
故道光六年卽經總督奏請禁止嚴查私井勒令封閉  
并聲明自開採子井以來試辦期內所收課銀不入正  
項遇有緊要差使例無開銷者卽於此內動支二十餘  
年共用銀六萬餘兩每年約需銀三千兩此係必不可

少之款以後請於溢課內歲撥銀三千兩以供開支永  
爲定制溢課昔未嘗聞也更章以來而始有道光六年  
以後而始著然惟出於元興永濟石膏箐井爲最多石  
膏箐井處極南界內以臨江府元江州外以思茅宣慰  
司所屬內五猛外八猛十三版納爲銷鹽地面初僅徵  
課銀一萬五千兩嗣因撥補他井缺額加辦溢課銀一  
萬八千兩道光六年查私井時官迤南道者人甚勇敢  
統帶兵練將十三版納私井全行封閉鹽銷大暢於是  
始將該井改歸迤南道管理每年加辦溢課銀四萬兩  
元興永濟之附於黑井也因補復井之廢井未另起正

課每年約徵銀八萬餘兩儘數收入溢課統計溢課之數十三萬有奇半於正課而他井不與焉惟有所贏卽有所絀若雲龍井抱香二井恩耕井嘉慶二十五年以後出滷卽形淡縮每年缺煎二三分不等而安甯新洪二井尤甚原額煎鹽二百八十餘萬斤後止能煎鹽七十餘萬斤短徵課銀皆於溢課內撥補除撥補缺額外每年約餘溢課銀七八萬兩一半聽候部撥一半留爲本省沿邊不時之需其正課向係抵撥銅本未嘗解部所徵養廉則自總督以下州縣佐貳凡預於鹽務者皆取給焉所徵井費卽外辦經費也滇鹽竈煎竈賣民運

民銷法甚簡易矣然亦出滷有稽開煎有查鹽之入倉出倉皆日籍月報民販領票運鹽掛號過掣與引商無異所歷關隘節節設卡盤驗惟大照票捆鹽三百斤一夫之力不能勝須分數包猶易夾私道光十八年將大照票剖一爲三一票一包盤驗較易票私始淨至通省銷鹽地面則以北杜川私南防土鹽爲關鍵川鹽侵滇以曲靖府南甯縣之白水司霑益州之炎松尋甸州之易古宣威州之可渡四處爲要口南界土鹽則自東之西皆有之東以安平之河口壩酒捏結白石頭寨四汛爲要隘而文山蒙自之蠻耗河口二處次之西以他郎

之里仙江渡口及永昌之杉木和蒙化之漾濞爲要隘皆籌給薪水責成地方官派撥員役常川守禦而各井走私之地守隘緝私兵練更星羅碁布焉蓋不淨私不能衛課也課賦以外尙有維西鹽稅猛野井課兩款維西在麗江府極西北隅北界前藏西接怒夷夷民雜處人食土鹽由通判徵解稅銀五十兩猛野舊有老井二眼曰磨舖井認納課銀一百三十兩曰蠻耗井認納課銀八兩此本皆在正課額內更章之初按鹽計課漏未核入因與抵粵餘息同造入溢課粵息者開化文山借食粵鹽皆餘鹽也并無引課收獲利息仍應解粵後改

食滇鹽照舊列徵每年約二千兩滇鹽之法以有餘補不足溢課不作正額常留餘地且民販無綱商之汰侈州縣無督銷之考成浮費陋規無因而起故能永遠遵行然日久弊生亦或時有石膏箐井之改歸迤南道也放票掣鹽多派家丁監視官嘗不能一至久而從中婪索該井運鹽每百斤例加耗鹽三十斤私增至七八十斤而官又勒令井民三十七戶每月多煎鹽數萬斤以供道署例外經費井民力不能支道光十七年後溢課卽常缺額皆責令井民墊完且礦洞開挖日久礦路愈遠兼以出礦夾泥帶沙煎鍊更難至二十五年又值

鹽法通考 卷二  
臨安元江疫毒傳染人多傷耗而猛野私井漸多自煎  
自食銷路大滯連年溢課虧缺大半嚴比亦不足數井  
民憊甚始赴督轅控告奏明裁禁陋規後加之溢課四  
萬兩酌減三成將抱香二井卽由威遠同知督管煎銷  
井地專司稽查而抱香二井卽由威遠同知督管煎銷  
其他法制稍變者惟彌沙井產鹽本少道光十一年卽  
將大使裁撤改歸劍川州知州兼管安豐井與白井近  
在咫尺原設一提舉兩大使未免冗濫故咸豐二年將  
安豐井大使議裁由白井大使兼管餘則悉由舊章也  
使地方安靜當至今可以無弊乃咸豐五年卽值回民

滋事三迤半遭蹂躪鹽務遂墮於地而石膏箐井亦於  
咸豐八年奏報坍塌矣蓋取之太盡洞老山空亦勢所  
必至也然就其山中躡覓礦綫當有子井可開卽老井  
塌歇數十年礦苗亦必復生以煤窰例之當不至於終  
成廢棄惟地方未復無從議此同治元年總督奏派回  
弁辦理黑井鹽務迄無音耗想亦格於時勢耳其奏銷  
向係甲年乙報奏至咸豐四年止按冊而稽年清年款  
從無蒂欠一切章程與原定無異惟各井煎鹽額數稍  
有參差而黑井白井未嘗少變也但使回務肅清舉而  
張之當自易易矣當乾隆年間鹽務極盛之時蜀鹽甫

行滇鹽方弊嗣後各省鹽務皆由盛而極衰多方調劑  
始起惟滇蜀鹽定章之後始終如一以未嘗加徵帑利  
攤派河工也然蜀以引商把持近亦積欠羨截百餘萬  
金滇則絲粒清完於是談鹽法者多爲就場抽稅之說  
矣夫前人規畫亦相度形勢因地制宜若額大課重之  
地漫爲嘗試未有能濟者也

